



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### Capitvlaria Regvm Francorvm

Additae sunt Marculfi monachi & aliorum formulae veteres, & Notae  
doctissimorum virorum

**Baluze, Etienne**

**Parisiis, 1677**

Coronationes.

**urn:nbn:de:hbz:466:1-22974**

KAROLI CALVI

E T

LVDOVICI EIVS FILII

REGVM FRANCORVM

CONSECRATIO SEV CORONATIO.

ITEM REGINARVM

IVDITH FILIÆ

E T

HERMINTRVDIS CONIVGIS

KAROLI EIVSDEM.

TITVLVS PRIMVS.

Karoli Calvi, quando in regno Lotharij  
coronatus est.

ORDO QVALITER KAROLVS REX FVIT  
coronatus in Mettis civitate anno DCCCLXIX. in mense Septembr. v. Idus  
Septembr. quæ evenit die Veneris, cum istis Episcopis, videlicet Hincmaro Ar-  
chiepiscopo, Adventio, Hattone, Arnulfo, Francone, Hincmaro, & Odone,  
quando quondam Rex Hlotharius, filius Hlotharij Imperatoris, fuit mortuus  
in Placentia civitate.

*Adnuntiatio Adventij Episcopi ante initium  
Missæ, in Ecclesia S. Stephani, coram Re-  
ge & Episcopis & aliis quamplurimis.*

**V**Os scitis, & multis in plurimis regnis  
est cognitum quantos & quales  
eventus tempore senioris nostri, quem ha-  
ctenus habuimus &c. usque devota mente  
fulcipere. ut supra pag. 215.

RESPONSIO

KAROLI AD POPVLVM

Quia, sicut isti venerabiles Episcopi  
unius ex ipsis voce dixerunt, & certis in-  
diciis ex vestra unanimitate monstrave-  
runt &c. usque antecessoribus exhibue-  
runt pag. 218.

## ADVENTIATIO

HINCMARI ARCHIEPISCOPI.

Ne alicui fortè videatur incongruè ac præsumptiosè me ac provinciæ nostræ venerabiles coëpiscopos facere quoniam &c. usque Te Deum laudamus pag. 217.

*Benedictiones super Regem Karolum ante Missam & altare sancti Stephani.*

## ADVENTIVS

EPISCOPVS METENSIS.

Deus qui populis tuis indulgentia consulis & amore dominaris, da huic famulo tuo spiritum sapientiæ, cui dedisti regimen disciplinæ; ut tibi toto corde devotus, & in regni regimine maneat semper idoneus, & in bonis operibus perseverans, ad æternum regnum te duce valeat pervenire. Per Dominum &c.

HATTO VIRDVNENSIS.

Gratiæ tuæ quæsumus, Domine, huic famulo tuo tribue largitatem, ut mandata tua te operante sectando, consolationem præsentis vitæ percipiat & futuræ. Per Dominum &c.

ARNULFVS TVLLENSIS.

Nostris, quæsumus, Domine, in regimine istius famuli tui propitiare temporibus; ut tuo munere dirigatur & nostra securitas & devotio Christiana. Per Dominum.

FRANCO TVNGRENSIS.

Da, quæsumus, Domine, huic famulo tuo salutem mentis & corporis; ut bonis operibus inhaerendo, tua semper mereatur virtute defendi. Per Dominum.

HINCMARVS LAVDVNENSIS.

Benedictionem tuam, Domine, hic famulus tuus accipiat: qua corpore salvatus & mente, & gratam tibi semper exhibeat servitutem, & propitiationis tuæ beneficia semper inveniat. Per Dominum.

ODO BELLOVACENSIS.

Conserva quæsumus, Domine, hunc famulum tuum, & benedictionum tuarum propitius ubertate purifica, ut eruditionibus tuis semper multiplicetur & donis. Per Dominum.

## BENEDICTIO

HINCMARI ARCHIEPISCOPI.

Extendat omnipotens Dominus dexteram suæ benedictionis, & effundat super te donum suæ propitiationis, & circumdet te felici muro cultodiæ suæ protectionis, sanctæ Mariæ & omnium sanctorum intercedentibus meritis. Amen.

Indulgeat tibi mala omnia quæ gessisti, & tribuat tibi gratiam & misericordiam quam humiliter ab eo deposcis; liberetque te ab adversitatibus cunctis & ab omnibus visibilibus & invisibilibus inimicorum insidiis. Amen.

Angelos suos bonos semper & ubique, qui te præcedant, comitentur, & subsequantur, ad custodiam tui ponat; & à peccato, seu gladio, & ab omnium periculorum discrimine te sua potentia liberet. Amen.

Inimicos tuos ad pacis caritatisque benignitatem convertat, & apud odientes te gratiosum & amabilem faciat. Pertinaces quoque in tui insectatione & odio confusione salutari induat. Super te autem sanctificatio sempiterna effloreat. Amen.

*Ad ista verba, Coronet te Dominus, inunxit enim Hincmarus Archiepiscopus de chrismate ad dextram auriculam, & in fronte usque ad sinistram auriculam, & in capite.*

Coronet te Dominus corona gloriæ in misericordia & miserationibus suis, & unget te in regni regimine oleo gratiæ Spiritus sancti sui, unde unxit Sacerdotes, Reges, Prophetas, & martyres, qui per fidem vicerunt regna, & operati sunt justitiam, atque adepti sunt promissiones, eisdemque promissionibus gratia Dei dignus efficiaris, quatenus eorum consortio in cœlesti regno perfui merearis. Amen.

Victoriosum te atque triumphatorem de visibilibus atque invisibilibus hostibus semper efficiat, & sancti nominis sui timorem pariter & amorem continuè cordi tuo infundat; & in fide recta ac bonis operibus perseverabilem reddat; & pacem in diebus tuis concessa, cum palma victoriæ te ad perpetuum regnum perducatur. Amen.

Et qui te voluit super populum suum constituere Regem, & in præsentis seculo felicem & æternæ felicitatis tribuat esse consortem. Amen.

Clerum ac populum, quem sua voluit opitulatione tuæ subdere ditioni, sua dispensatione

penfatione & tua adminiftratione per diuturna tempora te faciat feliciter gubernare, quò divinis monitis parentes, adverfitatibus omnibus carentes, bonis omnibus exuberantes, tuo ministerio fideli amore obfequentes, & in præfenti feculo pacis tranquillitate fruantur, & tecum æternorum civium confortio potiri mereantur. Amen. Quod ipfe præftare dignetur.

*Ad ifta verba, Coronet te Dominus, miferunt illi Epifcopi coronam in capite.*

Coronet te Dominus corona gloriae atque iuftitiæ, ut cum fide recta & multiplici bonorum operum fructu ad coronam pervenias regni perpetui, ipfo largiente cujus eft regnum & imperium in fecula feculorum.

*Ad ifta verba, Det tibi Dominus velle, dederunt illi palmam & fceprum.*

Det tibi Dominus velle & poffe quæ præcipit, ut in regni regimine fecundum voluntatem fuam proficiens, cum palma perfeverantis victoriæ ad palmam pervenias gloriae fempiternæ. Gratia Domini noftri Iefu Chrifti, qui vivit.

#### ORATIONES IN MISSA.

Da nobis, omnipotens Deus, ut beati Gorgonij martyris tui veneranda folemni-

tas & devotionem nobis augeat & falutem. Per Dominum.

Quæfumus, omnipotens, ut famulus tuus, qui tua miferatione fufcepit regni gubernacula; à te virtutum etiam percipiat incrementa: quibus decenter ornatus, & vitiorum monftra vitare, & ad te, qui via, veritas, & vita es, gratiofus valeat pervenire. Qui vivis & regnas cum Deo.

#### SVPER OBLATA.

Respice, Domine, munera populi tui fanctorum feftivitate votiva, & tuæ teftificatio veritatis nobis proficiat ad falutem. Per Dominum.

Munera, quæfumus, Domine, oblata fanctifica, ut & nobis unigeniti tui corpus & fanguis fiant, & Karolo Regi noftro ad obtinendam animæ corporifque falutem, te largiente, ufquequaque proficiant. Per eundem.

#### POST COMMUNIONEM.

Sacramentorum tuorum, Domine, communio fumpta nos falvet, & in tuæ veritatis luce confirmet. Per Dominum.

Hæc, Domine, communio falutaris famulum tuum ab omnibus tueatur adverfis: quatenus & ecclefiasticæ pacis obtineat tranquillitatem, & poft iftius temporis decurfum ad æternam perveniat hereditatem. Per Dominum.

## TITVLVS II.

Ludovici II. quando Rex Francorum  
consecratus eft.

ORDO QUALITER HLVDOVVICVS REX  
anno incarnationis dominica DCCCLXXVII. VI. Idus Decembris ab  
Hincmaro Archiepifcopo fuit coronatus in Compendio palatio; quando & hæc,  
quæ fequuntur, ab Epifcopis petita funt apud Regem, & ab eo promiffa  
Epifcopis.

#### PETITIO EPISCOPORVM.

**A**vobis perdonari nobis petimus ut unicuique de nobis & Ecclefiis nobis commiffis fecundum primum capitulum &c. usque exhibere debet, ut fuprà pag. 271.

#### PROMISSIO REGIS.

Promitto vobis & per dono quia unicuique Tom. II.

que de vobis & Ecclefiis vobis commiffis fecundum primum capitulum &c. usque exhibere debet, pag. 271.

*Benedictiones fuper Hludovicum Regem factæ.*

Deus, qui populis tuis virtute confulis, & amore dominaris, da huic famulo tuo

spiritum sapientia cum regimine disciplina; ut tibi toto corde devotus, in regni regimine maneat semper idoneus, tuoque munere ipsius temporibus securitas Ecclesie dirigatur, & in tranquillitate devotio Christiana permaneat. Per Dominum.

## SACRI OLEI INEVSIO.

Omnipotens sempiternus Deus creator & gubernator cæli & terræ, conditor & dispositor angelorum & hominum, qui Abraham famulum tuum de hostibus triumphare fecisti, Moyfi & Iosue populo tuo prælatis multiplicem victoriam tribuisti, humilem quoque David puerum tuum regni fastigio sublimasti, eumque de ore leonis & de manu bestia atque Golia, sed & de gladio maligno Saul & omnium inimicorum ejus liberaisti, & Salomonem sapientia pacisque ineffabili munere ditasti, respice quæsumus ad preces humilitatis nostræ, & hunc famulum tuum virtutibus, quibus præfatos fideles tuos decorasti, multiplici honoris benedictione condecora, & in regni regimine sublimiter colloca, & oleo gratia Spiritus sancti tui perunge, unde unxisti Sacerdotes, Reges, Prophetas, & martyres, qui per fidem vicerunt regna, & operati sunt iustitiam, atque adepti sunt promissiones. Cujus sacratissima unctio super caput ejus defluat, atque ad interiora ejus descendat, & cordis illius intima penetret, & promissionibus, quas adepti sunt victoriosissimi Reges, gratia tua dignus efficiatur, quatenus & in præsentis seculo feliciter regnet, & ad eorum consortium in cælesti regno perveniat. Per Dominum nostrum Iesum Christum filium tuum, qui unctus est oleo lætitiæ præ confortibus suis, & virtute crucis potestates aëris debellavit, tartara destruxit, regnumque diaboli superavit, & ad cælos victor ascendit. In cujus manu victoria omnis, gloria, & potestas consistunt, & tecum vivit & regnat Deus in unitate ejusdem Spiritus sancti per omnia secula seculorum. Amen.

## IMPOSITIO CORONÆ.

Coronet te Dominus corona gloriæ atque iustitiæ honore & opere fortitudinis, ut per officium nostræ benedictionis, cum fide recta & multiplici bonorum operum fructu, ad coronam pervenias regni perpetui, ipso largiente cujus regnum & imperium permanet in secula seculorum. Amen.

## SCEPTRI TRADITIO.

Accipe sceptrum, regie potestatis insigne, virgam scilicet rectam regni, virgam virtutis: qua te ipsum bene regas, sanctam Ecclesiam, populum videlicet Christianum tibi à Deo commissum, regia virtute ab improbis defendas, pravos corrigas, rectos ut viam rectam tenere possint tuo juvamine dirigas: quatenus de temporali regno ad æternum regnum pervenias, ipso adjuvante cujus regnum & imperium sine fine permanet in secula seculorum. Amen.

## BENEDICTIONES.

Dominus Deus omnipotens, qui dixit Nam. 6. ad Moysen servum suum, Loquere ad Aaron fratrem tuum, & ad filios ejus dicens, Sic benedicetis populo meo, & ego benedicam ei, benedicat tibi, & custodiat te. Amen.

Illuminet faciem suam super te, & miseretur tui. Amen.

Convertat vultum suum ad te, & donet tibi pacem. Amen.

Extendat dexteram suæ benedictionis, & effundat super te donum suæ propitiationis, & circumdet te felici muro custodiae suæ protectionis, sanctæ Mariæ & omnium sanctorum intercedentibus meritis. Amen.

Indulgeat tibi mala omnia quæ gessisti, & tribuat tibi gratiam & misericordiam quam humiliter ab eo deposcis, liberetque te ab adversitatibus cunctis & omnibus visibilibus & invisibilibus inimicorum insidiis. Amen.

Multiplicet in te copiam suæ benedictionis, & confirmet in spe regni cælestis. Amen.

Actus tuos corrigat, vitam emendet, mores componat, & te ad cælestis paradisi hereditatem perducat. Amen.

Talique intentione repleti valeas quæ ei in perpetuum placeat. Amen.

Angelos suos bonos semper & ubique, qui te præcedant, comitentur, & subsequantur, ad custodiam tuam ponat; & à peccato, seu gladio, & ab omnium periculorum discrimine te sua potentia liberet. Amen.

Inimicos tuos ad pacis caritatisque benignitatem convertat, & odientibus te gratiosum & amabilem faciat. Pertinaces quoque in tui infectione & odio confusione salutari induat. Super te autem sanctificatio sempiterna effloreat. Amen.

Victoriosum te atque triumphatorem

de visibilibus atque invisibilibus hostibus Dominus semper efficiat, & sancti nominis sui timorem pariter & amorem continuè cordi tuo infundat, & in fide recta ac bonis operibus perseverabilem reddat, & pace in diebus tuis concessa, cum corona victoriæ ad perpetuum te regnum perducat. Amen.

Et qui te voluit super populum suum constituere Regem, & in præsentī seculo felicem & æternæ felicitatis tribuat esse consortem. Amen.

Clerum ac populum, quem sua voluit opitulatione tuæ subdere ditioni, sua dispensatione & tua administratione per diuturna tempora te faciat feliciter gubernare: quò divinis monitis parentes, adversitatibus cunctis carentes, bonis omnibus exuberantes, tuo ministerio fideli amore obsequentes, & in præsentī seculo pacis tranquillitate fruantur, & tecum æternorum civium consortio potiri mereantur. Amen. Quod ipse præstare dignetur.

### TITVLVS III.

Iudith Karoli Calvi filiæ, cùm Regi Anglorum desponsata est anno DCCCLVI. apud Vermeriam palatium.

Anno DCCCLVI. Edilvlf Rex occidentalium Anglorum Roma rediens, Iudith filiam Karoli Regis, mense Iulio desponsatam, Kalendis Octobribus in Vermeria palatio in matrimonium accipit, & eam Hinemaro Durocortori Remorum Episcopo benedicente, imposito capiti ejus diademate, Reginæ nomine insignit, quod sibi sūæque genti catenus fuerat insuetum. Patratroque regis apparatus utrinque atque muneribus matrimonio, cum ea Britanniam regi sui ditionem navigio repetit. *Ex annalibus Berinianis.*

#### BENEDICTIO SVPER REGINAM quam Edilvlfus Rex accepit in uxorem.

N Vbas in Christo obnupta nube celesti, & refrigerata gratia spiritali, ac protecta ab omni illicita concupiscentia, pangas fœdus cum oculis tuis, ut non videas alienum virum ad concupiscendum eum, & non mœcheris in corpore vel corde tuo, & avertas oculos tuos, ne videant vanitatem: quatenus in via Domini vivificeris, ut possis dicere cum propheta: *Ad te levavi oculos meos qui habitas in caelis. & Levavi oculos meos in montes, unde veniat auxilium mihi.* Per conditorem & redemptorem ac Dominum nostrum Iesum Christum, qui cum Patre & Spiritu sancto vivit & regnat in secula seculorum.

Benedic, Domine, has dotes, & accipientes tua benedictione dotare digneris: ut conjugij fidem & thronum immaculatum servantes, sanctorum Patriarcharum adfiscisci mereantur consortio. Per Dominum.

Accipe anulum, fidei & dilectionis signum, atque conjugalis conjunctionis vin-

culum, ut non separet homo quos conjungit Deus. Qui vivit & regnat in omnia secula seculorum.

Despondeo te uni viro virginem castam atque pudicam futuram conjugem, ut sanctæ mulieres fuere viris suis, Sarra, Rebecca, Rachel, Hester, Iudith, Anna, Noëmi, favente auctore & sanctificatore nuptiarum Iesu Christo Domino nostro, qui vivit & regnat in secula seculorum.

Deus qui in mundi crescentis exordio multiplicandæ proli benedixisti, propitiare supplicationibus nostris, & huic famulo tuo & huic famulæ tuæ opem tuæ benedictionis infunde; ut in conjugali consortio secundum beneplacitum tuum affectu compari, mente consimili, sanctitate mutua copulentur. Dita eos fructibus sanctis & operibus benedictis. Fac illos talem sobolem generare quæ ad tui paradisi pertineat hereditatem. Aperi, Domine, januas cœli, & visita eos in pace. Inriga terras eorum, ut germinet fructum spiritalem.

Sandifica eos, qui datus es nobis ex virgine; & presta eis tempora salutis, quae ante tuum adventum praedixit sanctus Propheta Iohannes, ut hic fideliter credant, & beate viventes vitam & regnum consequantur aeternum, gratia tua, Christe salvator noster, qui cum Deo Patre in unitate Spiritus sancti visis & regnas Deus per omnia.

## BENEDICTIO REGINAE.

Te invocamus, Domine sancte, Pater omnipotens, aeternae Deus, ut hanc famulam tuam, quam tuae divinae dispensationis providentia in praesentem diem juvenali flore letantem crescere concessisti, tuae pietatis dono ditatam, plenam veritatis, de die in diem coram te & hominibus ad meliora semper proficere facias; ut in regimine suo gratiae supernae largitatem congaudens suscipiat, & misericordiae tuae muro adversitate undique munita, cum pace propitiationis vivere mereatur. Per Dominum.

## SVRSVM CORDA.

Domine sancte, Pater omnipotens, aeternae Deus, electorum fortitudo, & humilium celsitudo, qui in primordio per effusionem diluvij crimina mundi purgari voluisti, & per columbam ramum olivae portantem pacem terris redditam demonstrasti, iterum Aaron famulum tuum per unctionem olei sacerdotem unxisti, & postea per huius unguenti infusionem ad regendum populum Israeliticum Sacerdotes, Reges, & Prophetas perfecisti, vultumque Ecclesiae in oleo exhilarandum prophetica famuli tui voce David esse praedixisti, qui hoc etiam unguento famulae tuae Judith ad liberationem servorum tuorum & confusionem inimicorum vultum exhilarasti, & ancilla tuae Hester faciem hac spiritali misericordiae tuae unctione adeo lucifluam reddidisti ut efferatum cor Regis ad misericordiam & salvationem in te credentium, ipsius precibus inclinaret.

Te quaesumus, omnipotens Deus, ut per huius creaturae pinguedinem, columbae pace, simplicitate, ac pudicitia decoram efficias. Per Dominum nostrum Iesum Christum filium tuum, qui venturus est iudicare.

## CORONATIO.

Gloria & honore coronet te Dominus, & ponat super caput tuum coronam de spiritali lapide pretioso, ut quicquid in fulgore auri & in vario nitore gemmarum significatur, hoc in tuis moribus, hoc in actibus semper refulgeat. Quod ipse prestare dignetur cui est honor & gloria in secula seculorum.

## BENEDICTIONES.

Benedic, Domine, hanc famulam tuam, qui regna Regum a seculo moderans. Amen.

Opera manuum illius suscipe, & benedictione tua terra ejus de pomis fructuum caeli & rore atque abyssi subjacente repleatur. Amen.

De vertice antiquorum montium & collium aeternorum, de frugibus terrae, & plenitudine ejus tua benedictione lateatur. Amen.

Benedictio illius qui apparuit in rubo veniat super caput ejus. Da ei de rore caeli & de pinguedine terrae abundantiam frumenti & vini, ut serviant illi ac semini ejus populi, & in honore tuo tribus illam & semen ejus adorent. Amen.

Reple eam benedictionibus uberum & vulvae. Benedictiones patrum antiquorum confortatae sint super eam & super semen ejus, sicut promisisti servo tuo Abraham & semini ejus in secula. Amen.

Concede, quaesumus, omnipotens & misericors Deus, ut haec dona tua, quae fideles tui acceperunt de manu tua, dantibus, accipientibus, & dispensantibus ad praesentis vitae subsidium, ac redemptionem animarum, atque ad vitam capeffendam proficiant sempiternam. Per Dominum.



## TITVLVS IV.

Hermintrudis Reginae, quando sacrata est anno  
DCCCLXVI. mense Augusto in synodo  
Suessionensi.

ADLOCVTIO DVORVM EPISCOPORVM IN  
Ecclesia sancti Medardi quando Hermintrudis fuit consecrata in Reginam.

Concil.  
Suession.  
111. tit. 111.

Volumus vos scire, fratres, quia Dominus & senior noster Karolus Rex gloriosus nostrae humilitatis petiit devotionem ut auctoritate ministerij nobis à Deo conlatis, sicut ipse in Regem est unctus & consecratus episcopali auctoritate unctione sacra & benedictione, veluti in scripturis legimus Dominum praecipisse ut Reges ungerentur & sacrentur in regiam potestatem, ita uxorem suam Dominam nostram in nomine Reginae benedicamus, sicut & à sede apostolica & à nostris decessoribus antea de aliis factum comperimus. Et ut non vobis sit mirum quare hoc petat, fraternitati vestrae rationem reddere maturamus. Videlicet quia, sicut multis est cognitum, Deus omnipotens sua gratia istud regnum in manus suorum antecessorum mirabiliter adunavit, quod ipsi decessores sui nobiliter gubernaverunt, & per successiones sua progenies usque ad haec tempora rexit. Et isti nostro seniori Deus filios, sicut vobis notum est, dedit: in quorum nobilitate ad sanctam Ecclesiam & regnum, quod Deus illi ad regendum commisit, fideles illius spem maximam se habere sunt gratulati. De quibus ipse aliquos Deo obtulit, ut etiam de fructu ventris sui oblationem Deo offerret, aliquos Deus adhuc aetate immatura sua gratia de hoc seculo rapuit, ne, ut scriptum est, malitia mutaret corda eorum. aliquibus autem, quod vos non latet, suo iudicio talem passionem permisit incurere sicut fideles illius agnoscuntur dolere. Propterea petit benedictionem episcopalem super uxorem suam venire, ut talem sobolem ei Dominus de illa dignetur donare unde sancta Ecclesia solatium, & regnum necessariam defensionem, & fideles illius desiderabile adiutorium, & ista Christianitas optabilem tranquillitatem & le-

Sap. 4.

gem atque iustitiam, cum illis quos adhuc habet, annuente & cooperante Domino possit habere. Et de hoc in sanctis scripturis habemus auctoritatem, quia sicut Dominus ad Abraham dixit, *In femine tuo benedicentur omnes gentes*, cui jam centenario de nonagenaria uxore Isaac filium dedit, ita & ipsum Isaac uxorem sterilem accipere fecit, ut & in hoc, sicut in multis solet facere, misericordiae suae largitatem ostenderet. Et inde dicit scriptura quia *deprecatus est Isaac Dominum pro uxore sua, eo quod esset sterilis, & concepit*. Et non sit vobis mirum cur antea hoc non fecit, quia, sicut sacra scriptura dicit, in primordio conjunctionis masculi & feminae dixit Dominus ad Evam: *Ad virum tuum erit conversio tua, & ipse dominabitur tui*. Et cum jam essent moribus in legitima conjunctione maturi & provectae aetatis, Abraham & Sarra, & ut sanctus Petrus dicit, *Sarra obediebat Abrahae, dominum eam vocans*, dixit Dominus ad Abraham quod antea nec ipsi nec alio homini legimus illum dixisse: *Omnia quae dixerit tibi Sarra, audi vocem eius*. Iam enim & Abraham Presbyter merito vocabatur, & defecerant muliebria id est omnis lascivietas Sarrae: & tunc acceperunt benedictionem feminis benedicti à Domino, in quo benedicuntur omnes gentes. Amen. His ergo fulti auctoritatibus, in dispensandis Dei donis, qui ab illo ministri eius sumus ad hoc constituti, ut Leo dicit, non debemus esse difficiles, nec devotorum petitiones negligere, maxime si ipsas petitiones evidentibus indicis ex Dei viderimus inspiratione conceptas. Quia multiplex misericordia Dei ita salutis humanae subvenire decrevit ut praecipue sacerdotum supplicationibus ipsa salus debeat obtineri. Cui operi, ut in sacris literis legimus, ipse Sal-

Gen. 11.

Gen. 25.

Gen. 3.

1. Pet. 3.

Gen. 21.

Leo. 1.  
epist. 91.



Mat. 28.

vator intervenit, nec unquam ab his abest quæ ministris suis exequenda commisit dicens: *Ecce ego vobiscum sum omnibus diebus.* Et si quid per servitute nostram bono ordine & gratulando implemus affectu, ut Leo dicit, non ambigamus per Spiritum sanctum nobis fuisse donatum. Et ideo, fratres, quoniam ita est, & nostra pro vobis ministratio, & vestra erga nos conjuncta devotio, ut una fiat apud Dominum supplicatio, sicut legimus quia ad hoc constituti sunt sacerdotes ut prius pro suis, deinde pro populi orent peccatis, & oratio fiebat sine intermissione ad Deum pro Petro, id est, pro omni Episcoporum choro, orantibus nobis pro communi nostra immo pro totius Ecclesiæ ac populi necessitate atque salute, commune votum etiam vestra communis prosequatur oratio apud eum qui facit unanimes habitare in domo, & vivit & regnat in secula seculorum. Amen.

## ORATIO.

Domine sancte, Pater omnipotens, æterne Deus, qui potestate virtutis tuæ de nihilo cuncta fecisti, & dispositis universitatis exordiis, homini ad imaginem tuam facto inseparabile mulieris adjutorium condidisti, ac femineo corpori de virili dedisti carne principium, docens quia quod ex uno placuit tibi institui, non liceat ab homine separari, respice propitius super hanc famulam tuam maritali junctam consortio, quæ tua se expetit protectione muniri. Sit in ea jugum dilectionis & pacis. Fidelis & casta nubat in Christo, imitatrixque sanctarum permaneat feminarum. Sit amabilis ut Rachel viro, sapiens ut Rebecca, longæva & fidelis ut Sara. Nihil in ea ex actibus suis auctor prævaricationis usurpet. Nexa fidei mandatis permaneat, uni thoro juncta contactus illicitos fugiat. Muniat infirmitatem suam robore disciplinæ. Sit verecundia gravis, pudore venerabilis, doctrinis celestibus erudita. Sit fecunda in tibi placita sobole, sit probata & innocens. Percipiat per hanc sacram misericordiæ, lætitiæ, & exultationis olei unctionem sanitatem mentis, incolumitatem corporis, tutelam salutis, securitatem spei, corroboracionem fidei, plenitudinem caritatis. Corona eam, Domine, corona justitiæ, corona eam fru-

ctibus sanctis & operibus benedictis. Sit meritis & nomine atque virtute Regina, adstans in hoc seculo fide recta & operibus bonis, & in futuro honore & gloria coronata à dextris Regis, in vestitu bonorum operum, circumdata virtutum varietate. Fac illam talem sobolem generare quæ ad paradisi tui pertineat hereditatem. Præsta, Domine, huic famulæ tuæ tantum caritatis affectum & misericordiæ studium atque religionis augmentum ut tuum jugiter promereatur auxilium. Callidi serpentis ab ea venena repelle, & lorica fidei indutam scuto salutis eam defende, actus ejus corrige, vitam emenda, mores compone, & eam in senectute bona ad celestia regna digneris perducere. Per eundem Dominum nostrum.

Coronet te Dominus gloria & honore & sempiterna protectione. Qui vivit & regnat.

Deus omnipotens, qui benedixit Adam Gen. 1. & Evam dicens *Crescite & multiplicamini,* & Patriarcharum benedixit conjugia, quæ cum Tobia misit Raphael angelum suum, cujus ministerio demonium effugavit à Sarra uxore ipsius, benedixit te & illam futuram uxorem tuam, ut secundum præceptum Domini effecti duo in carne una, quod Deus jungit, homo non separet, & det vobis benedictionem de rore cæli & de pinguedine terræ. Benedicimus enim vobis in nomine Domini: qui mittat angelos suos bonos, ut vos custodiant semper, & omnem phantasiam & nequitiam atque versutiam omnium malignorum spirituum & hominum à vobis depellant, & ab omni inquinamento omnis adulterij, omnibusque insidiis humanis & diabolicis protegant, muniat, & defendant. Gratia Domini nostri Iesu Christi, qui amorem & timorem suum jugiter cordibus vestris infundat, ut consenescat pariter in senectute bona, & videatis filios filiorum vestrorum florentes in voluntate Domini, & pax vobiscum permaneat, atque in fide recta, ac bonis operibus, & concordia bona, & amore conjugali sincero, necnon & in confessione sanctæ Trinitatis & Ecclesiæ catholicæ communionem perseverantes, ad vitam perveniatis æternam. Quod ipse præstare dignetur cujus regnum & imperium sine fine permanet in secula seculorum. Amen.

✠